

## SOLDADU BAT.

Bizitza onetako lenengo kontentua  
 Gozetan asi nintzan pozez zoraturik,  
 Bere ondran asmetan abiaurik kantua,  
 Amaitzera orduko nengoan tristerik,  
 Maite neban maitea ikustean illik.

Gois baten eregi zan barrez egun sentia,  
 Ari bere nik bota neutsan itz neurtua;  
 Baña arratsaldera asitean bidia,  
 Lireak gura eustan jo negar soñua,  
 Illtera joialako egun aiñ dontsua.

Baita gazte denporan larrosak batuta nik,  
 Neure buru zoroa nai neban edertu;  
 Baña topau ezinda luzaroko lorarik,  
 Malko giñan begiok jatazan agortu,  
 Zergaitik lorak illik oi ziran igartu.

Mundua, nik zer neukan itanduten asi zan,  
 Ikusirik naibagez aurkitzen nintzala;  
 Baña eranzuera bertatik eban izan,  
 Egi andi au neutsan esan bereala;  
 Jayoa nazalako illtera noiala.

¡Ai! ezagutu baneu bear legez mundua,  
 Zerren on betiko bat zenbilchakon eske,  
 Baña ¿nun dau pozgei bat ez amaitutekua?  
 ¿Zegaz nire biotza atsegindu leike,  
 Eriotzak billosik ichi albanaike?

Au dogu soldadu bat, zarra baña zolia,  
 Beti garaipenagaz deuskuna urteten,  
 Baita urtengo dana, zerren bere bizia,  
 Ill eziña dalako bagara jayoten,  
 Jayoak diran arte, iraungo dau illten.

FELIPE ARRESE TA BEITIA.

